

LUNARI pal 1997



“La Santula dal paîs”

Timp indaûr, ma fintramâi dopo chista uera, tra lis autoritâz dal paîs, dopo il Sindic, il Plevan e il Maresciâl dai carabinieri, ‘a era ancja una figura, in chei ains una vora impuartanta pa comunitât: la Comari. Chista femina ‘a judava e assistiva lis parturientis cun competenza e responsabilitât. Ta cjamaris fredis da nestrîs cjasis duc’ i fruz a’ nassevin cul sô aiût, l’ospedâl l’era una roba ca no era cognossûda o ‘a era riservada solamentri a chei ca podevin vê quatri francs ta sachêta. In chei ains la Comari ‘a veva un bon se fâ a stai daûr a dutis ches feminis ca vevin di parturî, par via che i fruz nassevin coma foncs e cussi ‘a doveva cori di cjasa in cjasa par asisti ancja tre parz in t’una sola dì. Una das ultimis Comaris, ca n’da fat nassi miez paîs, a ‘era la Tunina Brandulina (Antonia Brandolin), nassuda a Frata tal lontan 1880, a trenta ains si era diplomada ta “I.R. Scuola d’Ostetricia” di Triest par “Levatrici”, par tant cun permission ufizziâl e cu lis cjartis in regula par zirca 40 ains ‘a à fat un servizi essenziâl pa nestra comunitât. Era la Santula* (cussì la clamavin duc’ chei ca nassevin cul sô aiût) di dutis ches canais ca discolz a’ corevin tal polvar da stradis blancis dal nestri paîs. Si vantava, cun rasòn, ca ta sô lungja ativitât no l’era muârt nissun di part.

‘A nus à lassât tal 1963, ma ancjamò tanc’ la ricuardin.

*La Santula: a’ vigniva cussi clamada la Comari par via che, quan’che ta fameis a’ nassevin tanc’ fruz, plui di qualchidun al muriva apena nassût. La Comari, se viodeva che qualchi frut l’era in pericol di vita, ‘a veva il podê di batialu. Se chist al riessiva a superâ la crisi e al viveva par plui ‘zornadis, al vigniva batiât ancja in glesia. Da chist fat ‘a nass il costùm di clamâ Santula la Comari.

I.C.